

Provedimenc del C11

Deliberes de la jonta del Comprenjorie ladin en cont de la APSP (ex Cèsa de Pausa), de la politiches per i joegn e de la mobilità



I componenc de la jonta del Comprenjorie Ladin de Fascia.

Te una de sia última sescions la jonta de Comprenjorie ge à dat sù ofizialmenter a la Cèsa de Pausa per jent de età de Vich chela ativitèdes assistenzièles che enschin ai 31 de mèrz les era de competenzenza del C11. De otober de l'an passà perauter la cèsa é doventèda na A.P.S.P. na azienda publica de servijes per la persona, con so nef statut aproà de november da la jonta regionèla e metuda sù te sia neva foja giuridica l'prim de jené de chest an da la jonta provinzièla. De firé la jonta provinzièla à enche nominà l'nef consei de amministrazion. Dal prim de oril donca, duc i contrac che l'Comprenjorie aea sotscriit per la Cèsa de Pausa, sibie chi de lurier coi dependenc che laora belapontin te la cèsa, sibie chi de apalt, forniment, servijes, colaborazion autonoma profesionèla che i é jà en esser, i jirà inant a la valiva condizions da dant encheben che i ge é stac zedui a la Cèsa de Pausa. Dutun ge vegn concedù a la Cèsa de Pausa de se emprevaler per nia del fabricat e de duc i bens che ge partegn, enschin canche vegnarà metù jù i documents per ge lascèr dut debant a l'azienda enstessa, descheche perveit l'articol 1 de so nef statut.

L C11 referent per la politiches di joegn

L Comprenjorie doventa capofila e soget istituzionèl de referiment per la politiches per i joegn te Fascia. La provinzia à vedù ti comuns, te la sociazions publiche e ti comprenjories la istituzions che pel se tor sù chesta competenzes endèna che se speta la neva comunitèdes pervedudes da la reforma istituzionèla de juyn del 2006. A una co la normative e la directives aproèdes da la Jonta provinzièla de Trent, dai 18 de oril 2008 l'é stat metù sù l'Grop per la politiches di joegn de Fascia, che tol ite raprezentanc del Comprenjorie, di 7 comuns, de la scola, de la piovanies e di desvalives gropes e sociazions de la val. La funzion de "referent istituzionèl" e de responsabol "politich" del grop per Fascia la é de Alessandra Cloch, ombolta de Poza e assessora a la

politiches sozièles del Comprenjorie, enveze la dotora Susanna Chiocchetti de Poza l'à abù l'encèria dal Comprenjorie de fèr da "referenta tecnich-organisativa" del grop. I 7 Comuns de Fascia à volù che sie l'C11 l'capofila e soget istituzionèl de referiment per la politiches per i joegn de duta la val, col doer de gestir i finanziamenc che vegnarà da la Provinzia e dai etres sogec publiche e privac. L Comprenjorie sarà l'fil che lea la val co la Provinzia autonoma di Trent per i projec, la ativitèdes e la scomenzadives portèdes dant e l'cognarà enche gestir te so bilanz i fondi metui a la leta da la Provinzia, dai 7 Comuns e da etres sogec publiche e privac per finanzièr sibie i cosé per l'referent che per la scomenzadives, estra chi che vegnissa dat da la Provinzia per fèr sù e endrezèr strutures destinèdes ai zentres per i joegn.

Riccardo Franceschetti raprezentant per l'esch de la mobilità

L C11 tol pèrt al "Desch de lurier su la mobilità" metù sù dal Comprenjorie de la Val de Fiem.

Jà da n trat de temp l'Comprenjorie ladin se cruzia de meter a jir scomenzadives, studies e convegnas per chierir soluzions che posse didèr miorèr l'sistem de la mobilità te Fascia e soraldut chisc ultimes egn l'à sport – dessema co l'APT de Fascia e enche col vejìn Comprenjorie de Fiem – n didament concret a la scomenzadives metudes en esser te chest ciamp da la sociazion Transdolomites. L C1 de Fiem à metù sù l'an passà l' "Desch de la Mobilità" che bina adum raprezentanc de desvalives sogec enteressé acioche i dae so contribut ai problemes metui dant e i porte inant scomenzadives de enrescida e de studie su la modalitèdes de trasport te l'ambient dolomitch da mont per ruèr a soluzions coerentes, che respete l'ambient e no les coste massa. L C11 à nominà desche sie raprezentant Riccardo Franceschetti, ombolt de Moena e assessor comprenjorièl competent apontin per i setores del turism e de la mobilità. (mac)